



Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10), Skupština Brčko distrikta BiH, na 4. redovnoj sjednici održanoj 10. marta 2021. godine, usvaja

## **ZAKON** **O SUDSKOJ POLICIJI BRČKO DISTRIKTA BOSNE I HERCEGOVINE**

### **DIO PRVI – OPŠTE ODREDBE**

#### **Član 1** **(Predmet zakona)**

Ovim zakonom uređuju se nadležnost, organizacija, djelokrug rada i ovlaštenja Sudske policije Brčko distrikta Bosne i Hercegovine (u daljnjem tekstu: Sudska policija), dužnosti i prava, posebne dužnosti i prava iz radnog odnosa, disciplinska i materijalna odgovornost, činovi, ocjena rada i unapređenje službenika Sudske policije i druga pitanja od značaja za organizaciju i rad Sudske policije.

#### **Član 2** **(Značenje izraza)**

(1) Pravosudne institucije u smislu ovog zakona su Osnovni sud Brčko distrikta Bosne i Hercegovine i Apelacioni sud Brčko distrikta Bosne i Hercegovine.

(2) Nosilac pravosudne funkcije u smislu ovog zakona je sudija u pravosudnim institucijama u Brčko distriktu BiH.

(3) Sudska policija je samostalni policijski organ, uspostavljena u okviru Pravosudne komisije, osnovana radi preduzimanja radnji kojim se osigurava uspješno vođenje odgovarajućeg sudskog postupka i stvaranja sigurnosnih uslova za rad pravosudnih institucija u Brčko distriktu BiH.

(4) Službenik Sudske policije u smislu ovog zakona je zaposlenik Sudske policije koji je ovlašten da primjenjuje ovlaštenja propisana ovim zakonom i postupa kao ovlaštena službena osoba prema Zakonu o krivičnom postupku Brčko distrikta BiH i drugim zakonima.

(5) Izrazi koji se koriste u ovom zakonu, koji imaju rodno značenje, bez obzira jesu li korišteni u muškom ili ženskom rodu, odnose se jednako i na muški i ženski rod, osim ako kontekst ne zahtijeva drugačije.

(6) Izrazi koji se koriste u ovom zakonu, koji su navedeni u jednini ili množini odnose se jednako i na jedninu i množinu, osim ako kontekst ne zahtijeva drugačije.

### Član 3 (Pravni osnov za rad)

Sudska policija u okviru svoje nadležnosti vrši poslove na osnovu Zakona o krivičnom postupku Brčko distrikta BiH, Krivičnog zakona Brčko distrikta BiH, Zakona o izvršenju krivičnih sankcija Brčko distrikta BiH, Zakona o sudovima Brčko distrikta BiH i drugim propisima donesenim na osnovu zakona, te pravilima koja donosi Pravosudna komisija Brčko distrikta Bosne i Hercegovine (u daljnjem tekstu: Pravosudna komisija) u skladu sa zakonom.

### Član 4 (Zaposleni u Sudskoj policiji)

Zapošljavanje u Sudskoj policiji Brčko distrikta BiH vrši se na osnovu profesionalnih sposobnosti i odražava sastav stanovništva.

### Član 5 (Obavještavanje javnosti)

Sudska policija obavještava javnost o aktivnostima iz djelokruga rada Sudske policije, kada je to u interesu javnosti ili Sudske policije.

### Član 6 (Dostavljanje izvještaja i podataka)

(1) Sudska policija podnosi mjesečni, polugodišnji i godišnji izvještaj o radu Pravosudnoj komisiji.

(2) Godišnji izvještaj o radu Sudske policije je sastavni dio informacije o radu Pravosudne komisije koju razmatra Skupština Brčko distrikta BiH.

### Član 7 (Sporazum o pružanju pomoći i međusobnoj saradnji)

(1) Predsjednik Pravosudne komisije na zahtjev glavnog tužioca Brčko distrikta BiH i direktora Kancelarije za pravnu pomoć Brčko distrikta BiH sklapa posebni sporazum o pružanju pomoći Sudske policije Tužilaštvu i Kancelariji za pravnu pomoć Brčko distrikta BiH.

(2) Sudska policija Brčko distrikta BiH može sklapati sporazume sa Sudskom policijom Federacije BiH i Republike Srpske u cilju međusobne saradnje, uz saglasnost Pravosudne komisije.

## DRUGI DIO – ORGANIZACIJA, UPRAVLJANJE, RUKOVOĐENJE I SREDSTVA ZA RAD

### Član 8

(Nadležnosti Pravosudne komisije)

U odnosu na Sudsku policiju Pravosudna komisija ima sljedeće nadležnosti:

- a) imenuje i razrješava komandira, zamjenika komandira i službenike Sudske policije;
- b) u skladu sa zakonom odlučuje o pravima i obavezama iz radnih odnosa za sve zaposlene u Sudskoj policiji;
- c) donosi pravilnike, uputstva, procedure, instrukcije i ostale podzakonske akte iz nadležnosti Sudske policije;
- d) planira i obezbjeđuje neophodna sredstva za rad i funkcionisanje Sudske policije;
- e) vrši i druge poslove u cilju efikasnog rada Sudske policije u skladu sa zakonima i podzakonskim aktima.

### Član 9

(Nadležnosti predsjednika Pravosudne komisije)

U odnosu na Sudsku policiju predsjednik Pravosudne komisije ima sljedeće nadležnosti:

- a) odgovoran je za upravljanje Sudskom policijom;
- b) nadzire i usmjerava rad Sudske policije;
- c) u skladu sa zakonom odlučuje o pravima i obavezama iz radnih odnosa za sve zaposlene u Sudskoj policiji;
- d) vrši i druge poslove u skladu sa zakonima i podzakonskim aktima.

### Član 10

(Nadležnosti komandira Sudske policije)

Komandir Sudske policije ima sljedeće nadležnosti:

- a) rukovodi Sudskom policijom i za svoj rad je odgovoran predsjedniku Pravosudne komisije;
- b) inicira Pravosudnoj komisiji predlaganje zakona vezanih za rad Sudske policije;
- c) priprema i Pravosudnoj komisiji predlaže donošenje podzakonskih propisa vezanih za rad Sudske policije;
- d) u skladu sa zakonom odlučuje o pravima i obavezama iz radnih odnosa za sve zaposlene u Sudskoj policiji;

- e) saraduje s pravosudnim institucijama i drugim organizacijama u pitanjima iz nadležnosti Sudske policije;
- f) redovno izvještava predsjednika Pravosudne komisije o radu i preduzetim aktivnostima Sudske policije;
- g) vrši i druge poslove propisane ovim zakonom i pravilnikom o unutrašnjoj organizaciji i sistematizaciji Sudske policije.

#### Član 11

(Zamjenik komandira Sudske policije)

Zamjenik komandira Sudske policije pomaže komandiru Sudske policije, zamjenjuje ga u njegovom odsustvu i za svoj rad je odgovoran komandiru Sudske policije.

#### Član 12

(Uslovi za imenovanje komandira)

(1) Za komandira Sudske policije može biti imenovano lice koje ima visoku školsku spremu ili završen prvi ciklus studija s ostvarenih najmanje 240 ECTS bodova i najmanje sedam (7) godina rukovodnog radnog iskustva u policijskim agencijama na istim ili sličnim poslovima.

(2) Pored uslova navedenih u stavu 1 ovog člana za komandira Sudske policije može biti imenovano lice koje ispunjava i ostale opšte uslove za prijem u državnu službu i posebne uslove propisane pravilnikom o unutrašnjoj organizaciji i sistematizaciji u Sudskoj policiji.

#### Član 13

(Uslovi za imenovanje zamjenika komandira)

(1) Za zamjenika komandira Sudske policije može biti imenovano lice koje ima visoku školsku spremu ili završen prvi ciklus studija s ostvarenih najmanje 240 ECTS bodova i najmanje pet (5) godina rukovodnog radnog iskustva u policijskim agencijama na istim ili sličnim poslovima ili deset (10) godina radnog iskustva u policijskim agencijama.

(2) Pored uslova navedenih u stavu 1 ovog člana za zamjenika komandira Sudske policije može biti imenovano lice koje ispunjava i ostale opšte uslove za prijem u državnu službu i posebne uslove propisane pravilnikom o unutrašnjoj organizaciji i sistematizaciji u Sudskoj policiji.

#### Član 14

(Broj zaposlenih i unutrašnja organizacija)

(1) Pravosudna komisija na prijedlog predsjednika Pravosudne komisije određuje ukupan broj službenika Sudske policije.

(2) Unutrašnja organizacija Sudske policije uređuje se pravilnikom o unutrašnjoj organizaciji i sistematizaciji Sudske policije koji donosi Pravosudna komisija na prijedlog komandira.

#### Član 15 (Sredstva za rad)

Sredstva za rad Sudske policije obezbjeđuju se u okviru budžeta Pravosudne komisije.

### DIO TREĆI – NADLEŽNOSTI I IZVRŠAVANJE POSLOVA

#### Član 16 (Nadležnosti Sudske policije)

(1) Sudska policija je nadležna za obavljanje sljedećih poslova:

- a) prikupljanje informacija;
- b) dovođenje osumnjičenih, optuženih osoba, svjedoka i vještaka;
- c) lišenje slobode osuđenih osoba i osoba kojima je određena mjera pritvora;
- d) sprovođenje osoba lišenih slobode;
- e) zadržavanje osoba lišenih slobode;
- f) provođenje sudskih odluka;
- g) fizičko osiguranje nosilaca pravosudnih funkcija, zaposlenih u pravosudnim institucijama i drugih osoba dok se nalaze u prostorijama pravosudnih institucija;
- h) fizička i tehnička zaštita objekata i imovine pravosudnih institucija i Sudske policije;
- i) održavanje reda u sudnicama i drugim prostorijama ili prostorima kojima se osigurava uspješnost vođenja odgovarajućeg postupka;
- j) izvršavanje drugih naloga pravosudnih institucija kojim se osigurava uspješno vođenje odgovarajućeg postupka.

(2) Sudska policija poslove iz stava 1 ovog člana obavlja na teritoriji Brčko distrikta BiH.

(3) Izuzetno od stava 2 ovog člana Sudska policija poslove iz stava 1 ovog člana može obavljati i na teritoriji Republike Srpske i Federacije Bosne i Hercegovine u slučajevima kada je za okončanje započete aktivnosti neophodno postupanje izvan teritorije Brčko distrikta BiH.

(4) Sudska policija poslove iz stava 1 ovog člana može obavljati i izvan teritorije Brčko distrikta BiH u slučajevima kada Sudska policija postupa po naredbama ili zamolnicama izdatim shodno odredbama zakona o međusobnom pružanju pravne pomoći u krivičnim stvarima i drugim pozitivnim propisima koji uređuju navedenu oblast.

(5) Sudska policija, u okviru svojih nadležnosti i ovlaštenja prilikom izvršenja poslova i zadataka, neposredno saraduje s Policijom Brčko distrikta BiH, u skladu sa zakonom. Obavezna neposredna saradnja iz stava 1 ovog člana podrazumijeva i preduzimanje mjera ovlaštenih službenih lica Policije Brčko distrikta BiH, kojima se obezbjeđuje nesmetano obavljanje poslova iz nadležnosti Sudske policije.

#### Član 17 (Prikupljanje informacija)

(1) Sudska policija u skladu s pismenom naredbom pravosudne institucije za prikupljanje informacija može vršiti prikupljanje informacija potrebnih za uspješno vođenje odgovarajućeg postupka.

(2) Sudska policija može vršiti prikupljanje informacija u cilju realizacije pismenih naredbi pravosudnih institucija.

(3) Sudska policija može vršiti prikupljanje informacija i bez posebne pismene naredbe pravosudne institucije, ukoliko se radi o informacijama potrebnim za izvršenje poslova iz člana 16 stava 1 tački g) i h) ovog zakona.

#### Član 18 (Dovođenje)

(1) U cilju osiguranja prisustva i uspješnog vođenja odgovarajućeg postupka Sudska policija postupa po pismenim naredbama pravosudnih institucija za dovođenje osumnjičenih i optuženih osoba, svjedoka i vještaka, u skladu s posebnim zakonom.

(2) Ukoliko osoba prema kojoj se izvršava dovođenje iz stava 1 ovog člana pokazuje znakove teške bolesti ili oboljenja ili je visokog stadija trudnoće, a čijim bi se dovođenjem životno ugrozio, Sudska policija će bez odlaganja obavijestiti postupajućeg nosioca pravosudne funkcije i zatražiti uputu za izvršavanje naredbe.

#### Član 19 (Dovođenje maloljetnih osoba)

(1) Sudska policija prilikom postupanja po naredbama za dovođenje maloljetnih osoba postupa u skladu s odredbama Zakona o zaštiti i postupanju s djecom i maloljetnicima u krivičnom postupku.

(2) Dovođenje maloljetne osobe se vrši u pratnji roditelja ili staratelja.

(3) Izuzetno od stava 2 ovog člana, ako roditelj ili staratelj odbija ili iz drugih razloga nije u mogućnosti da bude u pratnji maloljetne osobe ili je isti nepoznat, maloljetna osoba će se dovesti bez njihovog prisustva, o čemu će se bez odlaganja obavijestiti postupajući nosilac pravosudne funkcije.

Član 20  
(Lišenje slobode)

(1) Sudska policija u skladu s pismenom naredbom suda vrši poslove lišenja slobode osoba koje se nisu dobrovoljno javile na izdržavanje kazne zatvora i osoba kojima je određena mjera pritvora.

(2) Osoba lišena slobode mora se na maternjem jeziku ili jeziku koji razumije odmah obavijestiti o razlozima lišenja slobode te ima pravo da njena porodica, konzularni službenik strane države čiji je državljanin ili druga osoba koju ona odredi bude obavještena o njenom lišenju slobode.

(3) Ukoliko osoba prema kojoj se izvršava naredba za lišenje slobode iz stava 1 ovog člana pokazuje znakove teške bolesti ili oboljenja ili je visokog stadija trudnoće, a čijim bi se lišenjem slobode životno ugrozio, Sudska policija će bez odlaganja obavijestiti postupajućeg nosioca pravosudne funkcije i zatražiti uputu za izvršavanje naredbe.

Član 21  
(Mjesto dovođenja i lišenja slobode)

Dovođenje i lišenje slobode osoba iz čl. 18, 19 i 20 ovog zakona može se vršiti iz mjesta prebivališta ili boravišta osobe, iz ustanova ili drugog mjesta gdje se osoba nalazi.

Član 22  
(Sprovođenje osoba lišenih slobode)

(1) Sudska policija sprovođenje osoba lišenih slobode poduzima u skladu s pismenom naredbom suda.

(2) Pod sprovođenjem osoba lišenih slobode u smislu stava 1 ovog člana se podrazumijeva premještanje pritvorene osobe iz jedne u drugu ustanovu, premještanje pritvorenika u ustanovu za izdržavanje kazne zatvora ili u ustanovu za izdržavanje mjere obaveznog liječenja, sprovođenje osoba koje su u skladu s naredbama sudova o raspisanim potjericama lišene slobode od strane drugih policijskih agencija i druga sprovođenja pritvorenih osoba koja su vezana za procesne radnje u odgovarajućem postupku.

Član 23  
(Postupanje s osobama lišenim slobode i koje se dovode)

Službenici Sudske policije su odgovorni za sigurnost osoba lišenih slobode i osoba koje se dovode te su dužni spriječiti eventualni pokušaj njihovog bjekstva, onemogućiti kontakt s drugim osobama i onemogućiti druge radnje koje bi ugrozile sigurnost osoba ili prouzrokovale štetne posljedice za postupak.

Član 24  
(Zadržavanje osoba lišenih slobode)

(1) Sudska policija postupa po pismenim naredbama pravosudnih institucija za zadržavanje osoba lišenih slobode u smislu prava na zadržavanje koje je za pravosudne institucije utvrđeno odredbama Zakona o krivičnom postupku.

(2) U provođenju poslova iz stava 1 ovog člana Sudska policija poduzima mjere fizičkog i tehničkog osiguranja osobe lišene slobode kojoj je određena mjera zadržavanja, te osigurava njeno prisustvo tokom saslušanja.

(3) Primopredaja osobe lišene slobode koja se zadržava će se, shodno pismenoj naredbi nosioca pravosudne funkcije, izvršiti između ovlaštenih službenih osoba koje su osobu lišile slobode i službenika Sudske policije.

(4) Pravosudna institucija koja izdaje naredbu za zadržavanje je obavezna osigurati uslove potrebne za provođenje mjere zadržavanja, što pored ostalog podrazumijeva prostorije za zadržavanje s drugom infrastrukturom, ishranu za zadržanu osobu u toku zadržavanja i druge potrebne uslove.

(5) Izuzetno od stava 1 ovog člana Sudska policija može zadržati osobu koja se dovodi, a nije lišena slobode, u smislu odredbe čl. 19 i 20 ovog zakona i bez posebne naredbe pravosudne institucije za zadržavanje, s tim da zadržavanje ove osobe može trajati najduže 24 sata prije termina zakazanog saslušanja ili suđenja, odnosno prije predaje dovedene osobe nosiocu pravosudne funkcije koji je izdao naredbu za dovođenje.

(6) Osoba koja se zadržava u smislu stava 5 ovog člana ima pravo da njena porodica, konzularni službenik strane države čiji je državljanin ili druga osoba koju ona odredi budu obavješteni o njenom zadržavanju.

## Član 25

### (Provođenje sudskih odluka)

(1) Sudska policija u skladu s pismenom naredbom suda pruža pomoć u provođenju sudskih odluka, kojom prilikom stvara potrebne sigurnosne uslove za nesmetano provođenje sudske odluke i sigurnost učesnika u postupku izvršenja.

(2) U naredbi suda kojom se traži pomoć Sudske policije za provođenje sudskih odluka se obavezno navode sigurnosni i drugi razlozi zbog kojih se pomoć traži.

(3) Sigurnosnu procjenu i neophodne mjere i radnje potrebne za nesmetano provođenje sudske odluke, odnosno svakog konkretnog zadatka provodi Sudska policija.

(4) U skladu sa sigurnosnom procjenom Sudska policija može sudu predložiti i poduzimanje drugih mjera i radnji koje će na osnovu naloga suda izvršiti nadležni organi.

## Član 26

### (Fizička i tehnička zaštita objekata i imovine)



(1) Sudska policija vrši fizičku i tehničku zaštitu objekata i imovine koju koriste pravosudne institucije i Sudska policija.

(2) Poslovi iz stava 1 ovog člana podrazumijevaju obavezu Sudske policije na poduzimanje potrebnih mjera za zaštitu i sigurnost objekata, osoba koje se nalaze u objektu, praćenje i kontrolu stanja ulaska, kretanja i izlaska iz zgrade, kontrolu rada portirsko-čuvarske službe posebno u toku noći, te preduzimanje drugih potrebnih mjera za sigurnost objekata posebno u odnosu na sprečavanje eksplozije, napada na objekat i drugih vidova ugrožavanja sigurnosti.

(3) Sudska policija u obavljanju poslova iz stava 1 ovog člana može zabraniti unošenje predmeta pogodnih za ugrožavanje sigurnosti objekta kao i osoba koje se nalaze u objektu, te predmeta pogodnih za ometanje rada nosilaca pravosudne funkcije i pravosudne institucije.

#### Član 27 (Stepen i vrste zaštite)

Na osnovu sigurnosne procjene Sudska policija određuje stepen i vrstu zaštite, sačinjava planove osiguranja, te preduzima neophodne mjere i radnje u cilju adekvatnog osiguranja objekata koji se osiguravaju ili preduzimanje potrebnih mjera i radnji predlaže rukovodiocu pravosudne institucije.

#### Član 28 (Sigurnost u sudnicama i drugim prostorijama ili prostorima)

(1) Sudska policija brine o sigurnosti u sudnici i drugim prostorijama ili prostorima gdje se održavaju ročišta i saslušanja ili se osigurava uspješnost vođenja odgovarajućeg postupka, kojom prilikom preduzima preventivne i represivne mjere u cilju stvaranja sigurnog ambijenta za održavanje suđenja, saslušanja ili druge radnje.

(2) Sudska policija po odluci nosioca pravosudne funkcije ili sudskog izvršitelja može odstraniti sve osobe koje ometaju rad suda ili provođenje procesne radnje.

(3) Sudska policija u obavljanju poslova iz stava 1 ovog člana može zabraniti unošenje predmeta pogodnih za ugrožavanje sigurnosti osoba koje se nalaze u sudnici i drugim prostorijama ili prostorima iz stava 1 ovog člana, te predmeta pogodnih za ometanje rada nosilaca pravosudne funkcije i pravosudne institucije.

#### Član 29 (Izvršavanje drugih naredbi pravosudnih institucija)

Sudska policija izvršava i druge naredbe izdate od strane nosioca pravosudnih funkcija kojim se osigurava uspješno vođenje odgovarajućeg postupka.

## Član 30

(Propisi o vršenju poslova i primjeni ovlaštenja)

Način postupanja, taktika, metodika i druga pitanja od značaja za izvršenje poslova iz nadležnosti Sudske policije uredit će se propisom o načinu vršenja poslova i primjeni ovlaštenja Sudske policije, koji na prijedlog komandira Sudske policije donosi Pravosudna komisija.

## DIO ČETVRTI – OVLAŠTENJA I PRIMJENA OVLAŠTENJA

### Član 31

(Ovlaštenja službenika Sudske policije)

(1) Pored dužnosti i ovlaštenja propisanih Zakonom o krivičnom postupku i drugim procesnim zakonima, radi izvršenja poslova iz člana 16 ovog zakona, službenik Sudske policije ima sljedeća ovlaštenja:

- a) provjera i utvrđivanje identiteta osoba;
- b) obavljanje razgovora;
- c) izdavanje upozorenja i naredbi;
- d) privođenje;
- e) privremeno ograničenje slobode kretanja;
- f) potraga za osobama i stvarima;
- g) privremeno oduzimanje predmeta;
- h) privremeno korištenje tuđih vozila i komunikacijskih sredstava;
- i) ulazak u tuđi stan i druge prostorije;
- j) pretres osoba, stana i drugih prostorija, stvari i prijevoznih sredstava;
- k) pregled osoba, stana i drugih prostorija, stvari i prijevoznih sredstava;
- l) upotreba sredstava prinude;
- m) audio i video snimanje na javnim mjestima;
- n) obrada ličnih podataka i vođenje evidencija;
- o) postupanje s tajnim podacima i vođenje evidencija.

### Član 32

(Obaveza identifikacije)

(1) Službenik Sudske policije je pri izvršenju poslova iz nadležnosti Sudske policije u svakoj komunikaciji s drugim osobama dužan se predstaviti kao službenik Sudske policije.

(2) U izuzetnim slučajevima, kada identifikacija iz stava 1 ovog člana može ugroziti sigurnost službenika Sudske policije ili druge osobe, ili dovesti u pitanje postizanje zakonitog cilja koji opravdava primjenu ovlaštenja, službenik Sudske policije može se identifikovati na drugi način ili odgoditi identifikaciju.

(3) Kada okolnosti iz stava 2 ovog člana prestanu, službenik Sudske policije identifikuje se na način iz stava 1 ovog člana.

### Član 33

(Prikladnost i proporcionalnost primjene ovlaštenja)

(1) Primjena ovlaštenja mora biti prikladna i proporcionalna potrebi radi koje se poduzima.

(2) Ovlaštenja se primjenjuju sredstvima kojima se može postići zakoniti cilj s najmanje štetnih posljedica i u najkraćem vremenu.

### Član 34

(Odluke i naredbe za primjenu ovlaštenja)

(1) Službenik Sudske policije primjenjuje ovlaštenja prema vlastitoj odluci u skladu sa zakonom, kao i na osnovu naredbe nadređenog službenika ili nadležnog organa.

(2) Službenik Sudske policije neće izvršiti naredbu ukoliko bi time učinio krivično djelo opisano krivičnim zakonodavstvom u Bosni i Hercegovini.

(3) Službenik Sudske policije će u slučaju iz stava 2 ovog člana, odmah podnijeti izvještaj o neizvršenju naredbe svom neposredno nadređenom službeniku, odnosno višem nadređenom službeniku ukoliko je naredba izdata od neposredno nadređenog službenika Sudske policije.

(4) Ukoliko naredba bude ponovljena bez obzira na izvještaj o neizvršenju, službenik Sudske policije svoj izvještaj dostavlja predsjedniku Pravosudne komisije.

### Član 35

(Utvrđivanje i provjera identiteta osoba)

(1) Službenik Sudske policije u obavljanju poslova iz člana 16 ovog zakona ovlašten je izvršiti provjeru i utvrđivanje identiteta osobe.

(2) Službenik Sudske policije upoznat će osobu o razlozima zbog kojih je potrebno utvrđivanje ili provjera njenog identiteta.

### Član 36

(Načini utvrđivanja i provjere identiteta)

(1) Službenik Sudske policije utvrđivanje identiteta osobe vrši uvidom u njenu ličnu iskaznicu ili drugu javnu ispravu koja sadrži fotografiju.

(2) Utvrđivanje identiteta može se izvršiti i na osnovu izjave druge osobe čiji je identitet utvrđen na način opisan u stavu 1 ovog člana ili putem raspoloživih evidencija ili kod nadležne institucije.

(3) Ukoliko službenik Sudske policije nije u mogućnosti utvrditi identitet osobe na način iz stavova 1 i 2 ovog člana ili ukoliko postoji sumnja u vjerodostojnost isprave, službenik Sudske policije će utvrđivanje identiteta zahtijevati od Policije Brčko distrikta BiH.

### Član 37 (Obavljanje razgovora)

(1) Službenik Sudske policije u obavljanju poslova iz člana 16 ovog zakona može obavljati razgovore s drugim osobama.

(2) Obavljanje razgovora iz stava 1 ovog člana se može provoditi kroz aktivnosti Sudske policije na terenu ili u prostorijama Sudske policije u koje se može pozvati određena osoba.

(3) Ukoliko se obavljanje započetog razgovora na terenu ne može okončati na siguran i učinkovit način, službenik Sudske policije je ovlašten osobu pozvati usmeno pri čemu joj je dužan saopštiti razlog pozivanja.

(4) Pozivanje iz stava 2 ovog člana podrazumijeva pismeno pozivanje, a obavljanje razgovora se može vršiti u vremenu između 06.00 i 21.00 sat i ne može trajati duže od šest sati.

(5) Izuzetno, ukoliko postoji hitna potreba za obavljanje razgovora iz stava 1 ovog člana, službenik Sudske policije je ovlašten osobu pozvati usmeno pri čemu joj je dužan saopštiti razlog pozivanja.

### Član 38 (Izdavanje upozorenja i naredbi)

(1) Službenik Sudske policije upozorit će osobu koja svojim ponašanjem, djelovanjem ili propuštanjem može ugroziti izvršenje poslova iz člana 16 ovog zakona.

(2) Službenik Sudske policije u obavljanju poslova iz člana 16 ovog zakona može izdavati naredbe pravnim i fizičkim osobama.

(3) Upozorenja i naredbe izdaju se usmenim ili pismenim putem ili na drugi odgovarajući način (optičkim ili zvučnim signalima, rukom itd.).

### Član 39 (Privođenje)

(1) Službenik Sudske policije može u službene prostorije privesti:

a) osobu koja narušava red i mir u zgradi pravosudne institucije ili u zoni objekta koji se osigurava;

b) osobu koja prijeti, napada ili ometa rad nosioca pravosudne funkcije, drugih zaposlenika pravosudnih institucija ili službenika Sudske policije u izvršenju konkretnih poslova i zadataka;

c) osobu čiji je identitet potrebno utvrditi kada nema drugog načina;

d) osobu koja se ne odazove na poziv iz člana 37 stavova 4 i 5 ovog zakona.

(2) U skladu s procjenom Sudske policije, osobe iz stava 1 tački a), b) i c) ovog člana mogu se predati nadležnom organu, radi preduzimanja mjera i radnji iz njihove nadležnosti.

(3) Privođenje iz stava 1 ovog člana može trajati onoliko dugo koliko je potrebno za izvršenje službenog zadatka, a najduže šest sati.

#### Član 40

(Privremeno ograničenje kretanja)

(1) Službenik Sudske policije može privremeno ograničiti kretanje osoba na određenom prostoru ili u određenom objektu kada je to potrebno kako bi se osiguralo izvršenje poslova iz člana 16 ovog zakona.

(2) Privremeno ograničenje kretanja iz stava 1 ovog člana, može trajati onoliko dugo koliko je potrebno za realizaciju naredbe i ne može se nastaviti nakon postizanja cilja zbog kojeg je bilo primijenjeno.

#### Član 41

(Potraga za osobama i stvarima)

(1) Službenik Sudske policije ovlašten je provoditi mjere potrage za osobama prilikom postupanja po naredbama iz članova 18, 19 i 20 ovog zakona.

(2) Mjere potrage za stvarima službenik Sudske policije poduzima u skladu s pismenom naredbom suda.

(3) Mjere potrage u smislu stavova 1 i 2 ovog člana podrazumijevaju provođenje sigurnosno taktičkih radnji, kao što su pretraga, pregled određenih zgrada i prostorija, zasjeda, racija, djelimična ili potpuna blokada saobraćaja i drugog prostora.

#### Član 42

(Privremeno oduzimanje predmeta)

(1) Službenik Sudske policije ovlašten je privremeno oduzeti predmete koji su u posjedu osoba prema kojim se poduzimaju mjere i radnje u smislu odredbi ovog zakona, predmete koji su u posjedu drugih osoba koje ometaju ili mogu ometati izvršenje službene

radnje, kao i predmete koje može upotrijebiti za samoozljeđivanje, bijeg, napad na osobe ili imovinu koja se osigurava ili napad na službenika Sudske policije.

(2) Službenik Sudske policije dužan je izdati potvrdu o privremenom oduzimanju predmeta.

(3) Zavisno od konkretnih mjera poduzetih u provođenju poslova, predmeti iz stava 1 ovog člana će se predati na dalje postupanje nadležnoj pravosudnoj instituciji, nadležnom policijskom ili drugom organu, nadležnoj kazneno-popravnoj ustanovi ili će se po završetku službene radnje vratiti osobi od koje su oduzeti, ukoliko nije drugačije određeno zakonom ili odlukom pravosudne institucije.

#### Član 43

(Privremeno korištenje tuđih vozila ili komunikacijskih sredstava)

(1) Službenik Sudske policije ovlašten je privremeno koristiti tuđa vozila ili komunikacijska sredstva radi osiguranja izvršenja započetih poslova iz člana 16 ovog zakona čije je izvršenje neodloživo iz sigurnosnih razloga, a zbog nemogućnosti trenutnog korištenja raspoloživih sredstava Sudske policije.

(2) Službenik Sudske policije tuđa vozila i komunikacijska sredstva mogu koristiti do prestanka razloga iz stava 1 ovog člana.

(3) O korištenju tuđeg vozila i komunikacijskih sredstava službenik Sudske policije će odmah po sticanju uslova obavijestiti neposrednog rukovodioca, a vlasniku ili korisniku vozila ili komunikacijskog sredstva iz stava 1 ovog člana izdati potvrdu.

(4) Vlasnik ili korisnik vozila ili komunikacijskog sredstva iz stava 1 ovog člana ima pravo na naknadu troškova, odnosno štete pričinjene upotrebom njegove imovine.

(5) Propis o postupku utvrđivanja i visini naknade troškova ili štete iz stava 4 ovog člana donosi Pravosudna komisija.

#### Član 44

(Ulazak u stan i druge prostorije bez posebne naredbe)

(1) Službenik Sudske policije pri izvršenju poslova dovođenja ili lišenja slobode osumnjičene, optužene ili osuđene osobe može ući u stan ili druge prostorije bez posebne naredbe i bez svjedoka i pretražiti stan ili druge prostorije, ako se ta osoba nalazi u stanu ili drugim prostorijama.

(2) U slučaju iz stava 1 ovog člana sačinit će se potvrda u kojoj će se naznačiti razlog i vrijeme ulaznja u stan ili drugu prostoriju.

(3) U slučaju kad se pri izvršenju poslova iz stava 1 ovog člana u stanu ili drugim prostorijama ne zatekne vlasnik ili korisnik stana ili druge prostorije, službenik Sudske

policije je dužan sačiniti zapisnik te poduzeti mjere za osiguranje stana ili druge prostorije od neovlaštenog ulaska trećih osoba.

(4) O radnjama i postupcima iz stava 1 ovog člana Sudska policija će obavijestiti nosioca pravosudne funkcije koji je izdao naredbu za prinudno dovođenje ili lišenje slobode.

#### Član 45

(Pretres osoba, stana i drugih prostorija, stvari i prijevoznih sredstava)

(1) Sudska policija u skladu s naredbom suda može vršiti pretresanje osoba, stana, drugih prostorija, prijevoznih sredstava i pokretnih stvari.

(2) Pretresanje iz stava 1 ovog člana se provodi s ciljem bezbjednog i nesmetanog izvršenja poslova iz člana 16 ovog zakona.

(3) Pretresanje iz stavova 1 i 2 ovog člana se provodi na način propisan odredbama Zakona o krivičnom postupku Brčko distrikta BiH.

(4) Izuzetno od stava 1 ovog člana Sudska policija pretresanje osoba, stana, drugih prostorija, prijevoznih sredstava i pokretnih stvari može vršiti i bez naredbe suda, samo u slučajevima i na način propisan odredbama Zakona o krivičnom postupku Brčko distrikta BiH.

#### Član 46

(Pregled osoba, stvari i prijevoznih sredstava)

(1) Službenik Sudske policije ovlašten je da izvrši pregled osoba, stvari koje osoba nosi sa sobom i prijevoznih sredstava kada je to neophodno radi izvršenja poslova iz člana 16 ovog zakona, s ciljem pronalaska predmeta koji bi mogli biti iskorišteni za samoozljeđivanje, bijeg, napad na osobe i imovinu koja se osigurava, napad na službenika Sudske policije ili ometanje provođenja odgovarajućeg postupka.

(2) Pregled osobe u svrhu iz stava 1 ovog člana obuhvata uvid u sadržaj njene odjeće i obuće.

(3) Pregled stvari koje osoba nosi sa sobom obuhvata pregled stvari koje su kod osobe ili u njenoj neposrednoj blizini.

(4) Pregled prevoznih sredstava obuhvata pregled svih otvorenih i zatvorenih prostora prevoznog sredstva i predmeta koji se u njima prevoze.

(5) Prilikom pregleda iz stava 1 ovog člana službenik Sudske policije ovlašten je koristiti tehnička pomagala.

(6) Pregled osoba iz stava 1 ovog člana obavlja osoba istog spola.

Član 47  
(Vrsta sredstva prinude)

Službenik Sudske policije u obavljanju poslova iz nadležnosti Sudske policije može upotrijebiti sredstva prinude i to:

- a) fizičku snagu;
- b) službenu palicu;
- c) sredstva za vezivanje;
- d) sredstva za privremeno onesposobljavanje;
- e) hemijska sredstva za privremeno onesposobljavanje osoba;
- f) vatreno oružje.

Član 48  
(Principi upotrebe sredstva prinude)

(1) Službenik Sudske policije, prije upotrebe sredstva prinude, dužan je izdati naređenje i upozorenje osobi prema kojoj upotrebljava sredstva prinude, osim ako bi to ugrozilo sigurnost službenika Sudske policije ili druge osobe, ili to ne bi bilo svrsishodno u konkretnim okolnostima.

(2) Pod naređenjem i upozorenjem za upotrebu sredstva prinude iz stava 1 ovog člana podrazumijeva se verbalno upozorenje (jasno i glasno izgovaranje naredbe i upozorenja), kao i vizuelno upozorenje (stavljanje sredstva prinude u položaj za upotrebu, vađenje oružja iz futrole, repetiranje i sl.), odnosno preduzimanja radnji koje prethode upotrebi sredstva prinude.

(3) Službeniku Sudske policije nije dozvoljeno ispaljivati metak upozorenja.

Član 49  
(Uslovi za upotrebu vatrenog oružja)

U izvršavanju poslova iz člana 16 ovog zakona, službenik Sudske policije može upotrijebiti vatreno oružje, ako drugim sredstvima prinude ne može:

- a) zaštititi svoj ili život druge osobe, a trenutne okolnosti ukazuju na direktno prijeteću smrtnu opasnost ili nanošenje ozljede opasne po život ili zdravlje;
- b) odbiti neposredni napad kojim se ugrožava njegov život ili život drugih osoba koje je dužan štititi;
- c) odbiti neposredni napad na objekat koji je dužan štititi, ako se tim napadom ugrožava njegov ili život osoba koje je dužan štititi;
- d) spriječiti bijeg osumnjičenog, optuženog ili osuđenoga, ako osobite okolnosti ukazuju da će ta osoba ugroziti živote drugih osoba.

Član 50  
(Opasnost po život ili zdravlje)



Opasnost u smislu člana 49 tačke a) ovog zakona postoji ukoliko okolnosti konkretnog slučaja ukazuju da osoba posjeduje vatreno oružje, eksplozivnu napravu ili drugo oružje ili oruđe opasno po život ili zdravlje i da će ga upotrijebiti.

#### Član 51 (Neposredan napad)

Neposrednim napadom u smislu člana 49 tački b) i c) ovog zakona smatra se istovremeni protivpravni:

- a) napad vatrenim oružjem potezanjem vatrenog oružja;
- b) napad oruđem ili drugim opasnim predmetom;
- c) napad koji istovremeno vrše dvije ili više osoba;
- d) napad na mjestu i u vrijeme, kada se objektivno, ne može očekivati pomoć;
- e) napad očigledno fizički snažnije osobe ili osobe koja se služi posebnim vještinama.

#### Član 52 (Upotreba vatrenog oružja pri sprečavanju bijega)

(1) Pri sprečavanju bijega iz člana 49 tačke d) ovog zakona, službenik Sudske policije će pokušati da zaustavi osobu koja bježi izdavanjem usmene naredbe: "Stoj, Sudska policija!".

(2) Ako osoba ne postupi po naredbi iz stava 1 ovog člana, službenik Sudske policije će izdati usmeno upozorenje „Stoj, pucati!“ pa ako osoba ne postupi po upozorenju, službenik Sudske policije će upotrijebiti vatreno oružje.

(3) Noću, u gustoj magli, na nepreglednom terenu ili u šumi, kao i kada osoba bježi prema šumi ili u pravcu objekta gdje se može sakriti, vatreno oružje može se upotrijebiti nakon što osoba nije postupila po usmenoj naredbi iz stava 1 ovog člana.

(4) Službenik Sudske policije će pri upotrebi vatrenog oružja dati osobi dovoljno vremena da postupi po naredbi ili upozorenju.

(5) Ako osoba bježi prema okupljenim građanima a postoji opasnost da bi neko od građana upotrebom vatrenog oružja mogao biti smrtno ugrožen ili povrijeđen, službenik Sudske policije ne smije upotrijebiti vatreno oružje.

#### Član 53 (Naredba za upotrebu vatrenog oružja)

(1) Službenik Sudske policije može upotrijebiti vatreno oružje samoinicijativno ili po naredbi neposrednog rukovodioca.

(2) Službenik Sudske policije koji obavlja poslove i zadatke u sastavu tima ili grupe može da upotrijebi vatreno oružje samo po naredbi neposrednog rukovodioca, izuzev, ako je

upotreba vatrenog oružja jedino sredstvo za odbranu od neposrednog napada i opasnosti, oružje može upotrijebiti i prije izdate naredbe.

(3) Naredbu za upotrebu vatrenog oružja neposredni rukovodilac može izdati samo na mjestu događaja i u skladu s članom 49 ovog zakona.

#### Član 54 (Upotreba vatrenog oružja prema životinjama)

Vatreno oružje upotrijebljeno prema životinjama koje neposredno ugrožavaju živote službenika Sudske policije ili osobe koja se štiti ne smatra se upotrebom vatrenog oružja u smislu ovog zakona.

#### Član 55 (Traženje pomoći)

Upotreba vatrenog oružja pucanjem u zrak radi signalizacije i traženja pomoći, ne smatra se upotrebom vatrenog oružja u smislu ovog zakona.

#### Član 56 (Uslovi za upotrebu drugih sredstava prinude)

U izvršavanju poslova iz člana 16 ovog zakona, službenik Sudske policije može upotrijebiti sredstva prinude iz člana 47 tački od a) do f) ako drugačije ne može:

- a) da spriječi napad na službenika Sudske policije;
- b) da spriječi napad na osobu koju je dužan štiti;
- c) da spriječi otpor osobe prema kojoj se izvršava nalog;
- d) da spriječi otpor osobe koja ometa izvršenje službenog zadatka;
- e) da spriječi bijeg osobe;
- f) da spriječi samopovređivanje osobe;
- g) da spriječi prouzrokovanje materijalne štete na objektima i drugoj imovini koju osigurava.

#### Član 57 (Ograničenja upotrebe sredstava prinude)

(1) Sredstva prinude se ne mogu upotrijebiti prema maloljetnicima, očigledno bolesnim, starim i iznemoglim osobama, teškim invalidima i ženama čija je trudnoća vidljiva.

(2) Izuzetno od odredbe stava 1 ovog člana, službenik Sudske policije može upotrijebiti sredstva prinude i prema tim osobama, ako neka od tih osoba vatrenim oružjem, oruđem ili drugim opasnim predmetima neposredno ugrožava život službenika Sudske policije, život osobe koja se štiti ili život osobe prema kojoj se izvršava nalog.

(3) Upotreba vatrenog oružja nije dozvoljena ako bi ugrozila živote drugih ljudi, osim ako je to jedini način odbrane sebe ili drugoga od izravnog napada ili opasnosti.

(4) Službenik Sudske policije ne smije upotrijebiti vatreno oružje protiv vozila i plovila u pokretu, osim, ako se to vozilo i plovilo koristi kao sredstvo neposrednog napada prema službeniku Sudske policije i osobi koja se štiti, ili ako je to neophodno radi sprečavanja neposrednog napada u slučaju pucanja iz oružja na službenika Sudske policije, osobe koja se štiti ili šticeenog objekta pod uslovima iz člana 49 tačke c) ovog zakona.

#### Član 58

(Izveštavanje o upotrebi sredstava prinude)

(1) O svakoj upotrebi sredstava prinude, u skladu s ovim zakonom, službenik Sudske policije koji je upotrijebio ili naredio upotrebu sredstava prinude, dužan je podnijeti pisani izvještaj.

(2) O upotrebi sredstva za vezivanje osoba prethodno lišenih slobode, neće se sačinjavati izvještaj iz stava 1 ovog člana.

#### Član 59

(Ocjena zakonitosti i pravilnosti upotrebe sredstava prinude)

O zakonitosti i pravilnosti upotrebe sredstava prinude od strane službenika Sudske policije, odlučuje predsjednik Pravosudne komisije.

#### Član 60

(Propis o upotrebi sredstava prinude)

Propis o upotrebi sredstava prinude, uslovima i načinu upotrebe sredstava prinude, izvještavanju, ocjeni zakonitosti i pravilnosti i posttraumatskom savjetovanju nakon upotrebe sredstava prinude od strane službenika Sudske policije na prijedlog komandira Sudske policije, donosi Pravosudna komisija.

#### Član 61

(Pomoć građana službeniku Sudske policije)

(1) Osoba koja na zahtjev službenika Sudske policije pruži pomoć ili samoinicijativno učestvuje u savladavanju osobe koja pruža otpor ili hvatanju osobe koja bježi i tom prilikom bude ozlijeđena, razboli se ili trajnije bude spriječena za rad, ima prava iz socijalnog osiguranja, kao i osoba u stalnom radnom odnosu.

(2) Ako osoba iz stava 1 ovog člana, prilikom pružanja pomoći službeniku Sudske policije izgubi život, pokopat će se o trošku Sudske policije, u mjestu koje odredi njena porodica.

(3) U slučaju iz stava 2 ovog člana, porodici ili osobi koju je izdržavala poginula osoba pripada jednokratna novčana pomoć u visini posljednjih šest mjesečnih bruto plata

poginule osobe ili šest prosječnih mjesečnih bruto plata isplaćenih u Brčko distriktu BiH ako poginula osoba nije bila u radnom odnosu ili je to za njih povoljnije.

(4) Osoba iz stavova 1 i 3 ovog člana ima pravo na naknadu štete ukoliko nisu oštećene u smislu odredbe stavova od 1 do 3 ovog člana.

#### Član 62

(Audio i video snimanje na javnim mjestima)

Radi izvršenja poslova iz člana 16 ovog zakona službenik Sudske policije može vršiti audio i video snimanje osobe ili grupe osoba, okruženja i svake druge okolnosti ili predmeta.

#### Član 63

(Obrada ličnih podataka i vođenje evidencija)

(1) Sudska policija ovlaštena je obrađivati lične podatke i voditi evidencije koje uključuju i lične podatke u vezi s izvršenjem poslova iz člana 16 ovog zakona i primjeni ovlaštenja iz člana 31 ovog zakona.

(2) Pravo obrade ličnih podataka iz stava 1 ovog člana ima samo službenik Sudske policije koji je za to posebno ovlašten od strane komandira.

(3) Službenik Sudske policije ima pravo pristupa evidencijama iz stava 1 ovog člana i ovlašten je koristiti lične podatke u slučajevima kada je to neophodno za izvršenje poslova iz člana 16 ovog zakona i primjenu ovlaštenja iz člana 31 ovog zakona.

(4) Službenik Sudske policije ne smije ustupati lične podatke trećoj strani osim u slučajevima kada je to neophodno za izvršenje poslova iz člana 16 ovog zakona i primjenu ovlaštenja iz člana 31 ovog zakona.

(5) Način obrade i korištenja ličnih podataka, vrsta, sadržaj i način vođenja evidencija uređen je Pravilnikom o provođenju Zakona o zaštiti ličnih podataka u Pravosudnoj komisiji.

### DIO PETI – RADNI ODNOSI, PRAVA I DUŽNOSTI SLUŽBENIKA SUDSKE POLICIJE

#### Član 64

(Status službenika Sudske policije)

Službenik Sudske policije u pravima iz radnog odnosa, zdravstvenog, penzijskog – invalidskog osiguranja, kao i drugim pravima po osnovu rada, a koja nisu propisana ovim zakonom, se izjednačava s pravima koja ima policijski službenik Policije Brčko distrikta BiH.

#### Član 65

### (Dužnosti službenika Sudske policije)

(1) Službenik Sudske policije dužan je poznavati zakone i druge propise na osnovu kojih vrši službu i stručno se usavršavati.

(2) Službenik Sudske policije dužan je postupiti po naređenju rukovodioca.

(3) Službenik Sudske policije pri obavljanju svojih dužnosti rukovodit će se opštim interesom, te naročito služiti i pomagati javnosti.

(4) Službenik Sudske policije bit će nepristran te izbjegavati aktivnosti ili propuste koji su nespojivi s dužnostima ili koji krše dužnosti propisane ovim zakonom.

(5) Službenik Sudske policije će se suzdržavati od javnog promoviranja političkih i vjerskih uvjerenja.

(6) Službenik Sudske policije neće tražiti niti prihvaćati za sebe ili svoje srodnike ili drugu osobu bilo kakvu dobit, korist, uslugu ili kakvu drugu naknadu.

(7) Službenik Sudske policije je tokom i izvan radnoga vremena dužan djelovati na način koji ne šteti interesu i ugledu Sudske policije.

(8) Službenik Sudske policije koji se zatekne na mjestu izvršenja krivičnog djela ili prekršaja dužan je o tome bez odlaganja obavijestiti nadležni organ, a u slučajevima kada bi izvršenjem krivičnog djela ili prekršaja mogle nastupiti posljedice opasne po život i zdravlje građana dužan je primijeniti ovlaštenja i sredstva prinude u skladu s odredbama ovog zakona, o čemu je odmah po sticanju uslova dužan obavijestiti neposrednog rukovodioca.

(9) Službenik Sudske policije dužan je u svrhu provjere svoje posebne psihičke i tjelesne zdravstvene sposobnosti pristupiti sistematskom kontrolnom zdravstvenom pregledu, a na obrazloženi prijedlog doktora primarne zdravstvene zaštite ili nadređenog rukovodioca i vanrednom kontrolnom zdravstvenom pregledu.

(10) Službenik Sudske policije je u slučaju da se protiv njega vodi krivični ili prekršajni postupak isto dužan prijaviti neposrednom rukovodiocu, osim prekršaja iz oblasti sigurnosti prometa.

(11) Službenik Sudske policije pridržavat će se i svih drugih dužnosti propisanih ovim zakonom i podzakonskim propisima.

### Član 66

#### (Posebna zdravstvena sposobnost)

Pravosudna komisija na prijedlog komandira, donosi propis kojim utvrđuje kriterije i način utvrđivanja posebne zdravstvene sposobnosti službenika Sudske policije iz člana 65

stava 9 ovog zakona i kandidata iz člana 78 ovog zakona, kao i druga pitanja koja se odnose na zdravstveni i psihofizički pregled.

#### Član 67 (Posebni uslovi rada)

(1) Poslovi službenika Sudske policije smatraju se poslovima s posebnim uslovima rada.

(2) Službenik Sudske policije dužan je izvršavati i one poslove koji mogu dovesti u opasnost njega i njegov život.

#### Član 68 (Nespojivost)

Službenik Sudske policije ne može obnašati dužnost ili obavljati djelatnosti koje su nespojive s njegovim službenim dužnostima, a posebno:

- a) ne može biti nosiocem javne dužnosti;
- b) ne može obavljati dodatnu djelatnost uz naknadu, osim uz odobrenje predsjednika Pravosudne komisije;
- c) ne može biti članom političke stranke niti slijediti upute političkih stranaka, niti u uniformi prisustvovati skupovima političkih stranaka ili drugim političkim skupovima, osim ukoliko je na dužnosti;
- d) ne može davati javne izjave niti na drugi način komentirati rad i aktivnosti pravosudnih institucija i Sudske policije.

#### Član 69 (Obaveza čuvanja informacija)

(1) Službenik Sudske policije je dužan čuvati podatke, informacije i isprave do kojih je došao u obavljanju poslova, čijim bi se odavanjem neovlaštenoj osobi moglo osujetiti ili ugroziti obavljanje poslova pravosudne institucije ili Sudske policije.

(2) Obaveza čuvanja podataka, informacija i isprava iz stava 1 ovog člana se nastavlja i nakon prekida radnog odnosa službenika Sudske policije.

#### Član 70 (Prava službenika Sudske policije)

Službenik Sudske policije ima pravo:

- a) na stalni radni odnos do trenutka dok se ne steknu zakonski uslovi za prestanak radnog odnosa;
- b) na odmor i odsustva, kako je određeno ovim zakonom i podzakonskim propisima;
- c) biti nagrađen za dužnosti i obavljanje poslova, kako je određeno ovim zakonom i podzakonskim propisima;

- d) na platu, uvećanje plate po osnovu posebnih uslova rada i naknade, u skladu sa zakonom i podzakonskim propisima;
- e) na osiguranje od posljedica nesrećnog slučaja s uključenim rizikom od prirodne smrti;
- f) na napredovanje u karijeri i profesionalni razvoj kroz obuku i na drugi način;
- g) osnivati i učlanjivati se u sindikat ili udruženje, u skladu sa zakonom;
- h) na pošten i pravičan tretman, bez obzira na spol, rasu, nacionalno ili socijalno porijeklo, vjeroispovijest ili drugu pripadnost;
- i) da nadređeni i podređeni postupaju s njim uz poštivanje ljudskog dostojanstva.

#### Član 71 (Uniforma i službene oznake)

(1) Službenik Sudske policije ima pravo na uniformu sa službenim oznakama za obavljanje poslova.

(2) Službenik Sudske policije zbog specifičnosti prirode određenih poslova i zadataka i u skladu s prihvaćenim policijskim standardima, određene poslove i zadatke može izvršavati u civilnoj odjeći ili posebnoj službenoj uniformi i s opremom.

(3) Pravosudna komisija, na prijedlog komandira, donosi propis o izgledu i nošenju uniforme i službenim oznakama u Sudskoj policiji.

#### Član 72 (Oprema i oružje)

(1) Službenik Sudske policije ima pravo na opremu i oružje za obavljanje poslova.

(2) Pravosudna komisija, na prijedlog komandira, donosi propis o vrsti opreme, držanju i nošenju opreme, oružja i municije u Sudskoj policiji.

#### Član 73 (Kodeks ponašanja službenika Sudske policije)

(1) Pravila ponašanja, međusobni odnosi službenika Sudske policije, odnosi prema građanima i lični izgled službenika Sudske policije propisuju se Kodeksom ponašanja službenika Sudske policije, koji na prijedlog komandira donosi predsjednik Pravosudne komisije.

(2) Propisom iz stava 1 ovog člana uredit će se izgled, način i druga pitanja vezana za nošenje kose, brade, brkova, „piercinga“, tetovaža, nakita, kao i drugih stvari koje mogu ugroziti ili otežavati izvršenje službenih zadataka ili mogu imati štetan uticaj na nesmetano obavljanje službenih zadataka ili po svom izgledu odstupaju od pravila nošenja uniforme.

#### Član 74

### (Službena iskaznica i značka)

(1) Službenik Sudske policije svojstvo službenika Sudske policije dokazuje iskaznicom i značkom Sudske policije koja mora biti prepoznatljiva kao oznaka Sudske policije.

(2) Službenu iskaznicu i značku Sudske policije izdaje Pravosudna komisija.

(3) Izgled službene iskaznice i značke Sudske policije, postupak izdavanja, oduzimanja kao i druga pitanja, na prijedlog komandira propisuje Pravosudna komisija.

### Član 75

#### (Pravo na pravnu i finansijsku pomoć)

(1) Ako se protiv službenika Sudske policije pokrene sudski postupak zbog upotrebe sredstava prinude ili drugih radnji tokom izvršenja zadataka, Sudska policija će službeniku Sudske policije osigurati stručnu pravnu i finansijsku pomoć, s ciljem angažovanja branioca i pokrivanja ostalih finansijskih troškova, kojima službenik Sudske policije bude izložen u vezi s postupkom.

(2) Pravna i finansijska pomoć također će se osigurati službeniku Sudske policije kao oštećeniku u postupku za naknadu štete, odnosno njegovoj porodici, ukoliko je šteta nanesena u izvršenju ili u vezi s izvršenjem zadataka Sudske policije.

(3) U slučajevima iz stavova 1 i 2 ovoga člana Sudska policija će osigurati pravnu i finansijsku pomoć službeniku Sudske policije i nakon prestanka radnoga odnosa, izuzev u slučaju da ima pravo na istu pravnu pomoć po nekom drugom osnovu.

(4) Sudska policija će pravnu i finansijsku pomoć osigurati i građaninu koji je pomogao službeniku Sudske policije ako je protiv građanina pokrenut krivični postupak zbog djelovanja koje je u vezi s pruženom pomoći.

(5) Izuzetno od stavova od 1 do 4 ovog člana službenik Sudske policije nema pravo na pravnu i finansijsku pomoć ukoliko Sudska policija utvrdi da je djelovao izvan okvira svojih ovlasti ili ih je zloupotrijebio.

## DIO ŠESTI – ZAPOŠLJAVANJE I RADNI ODNOSI

### Član 76

#### (Nivoi pristupa)

Nivoi pristupa Sudskoj policiji mogu biti:

a) u činu sudskog policajca - kao prvi nivo pristupanja za kandidata koji se prima u Sudsku policiju na radno mjesto za koje je propisana završena SSS - IV stepena;



b) u činu mlađeg inspektora Sudske policije - kao drugi nivo pristupa za kandidata koji se prima u Sudsku policiju na radno mjesto za koje je propisan završeni prvi ciklus visokog obrazovanja s ostvarenih 180 ECTS bodova ili VŠS - VI stepen stručne spreme;

c) u činu višeg inspektora Sudske policije – kao treći nivo pristupa za kandidata koji se prima u Sudsku policiju na radno mjesto za koje je propisan završeni prvi ciklus visokog obrazovanja s ostvarenih 240 ECTS bodova ili VSS - VII stepen stručne spreme;

d) u činu samostalnog inspektora Sudske policije – kao četvrti nivo pristupa za kandidata koji se prima u Sudsku policiju na radno mjesto komandira Sudske policije.

#### Član 77

(Opšti uslovi za zapošljavanje)

Da bi bio zaposlen kao službenik Sudske policije osoba mora ispunjavati sljedeće opšte uslove:

- a) državljanstvo Bosne i Hercegovine;
- b) životna dob između 18 i 27 godina života za početni čin sudski policajac, a između 18 i 35 godina života za početni čin mlađi inspektor Sudske policije;
- c) SSS - IV stepen za čin sudski policajac, a najmanje završen prvi ciklus visokog obrazovanja, 180 ECTS bodova ili VŠS - VI stepena školske spreme za čin mlađeg inspektora Sudske policije;
- d) da je fizički i psihički sposobna za obavljanje poslova službenika Sudske policije;
- e) da nije otpuštena s bilo koje pozicije u organima državne uprave, institucije s javnim ovlaštenjima na svim nivoima u Bosni i Hercegovini ili vojne službe u Bosni i Hercegovini kao rezultat disciplinske sankcije;
- f) da protiv njega nije pokrenut krivični postupak ili da nije izrečena pravosnažna kazna zatvora za krivično djelo, osim za krivična djela protiv bezbjednosti saobraćaja, u skladu s krivičnim zakonodavstvom;
- g) da se na tu osobu ne odnosi član IX stav 1 Ustava;
- h) da ne postoje okolnosti koje bi dovele do sukoba interesa.

#### Član 78

(Posebni uslovi)

Pored opštih uslova propisanih članom 77 ovog zakona, osoba mora ispunjavati i posebne uslove utvrđene Pravilnikom o unutrašnjoj organizaciji i sistematizaciji u Sudskoj policiji, koji se odnose na konkretno radno mjesto.

#### Član 79

(Postupak zapošljavanja i radni odnosi)

(1) Na postupak zapošljavanja i radne odnose službenika Sudske policije shodno se primjenjuje Zakon o službenicima i namještenicima u pravosuđu Brčko distrikta BiH i podzakonski akti doneseni na osnovu zakona.

(2) Kriterije i sadržaj testiranja prilikom zapošljavanja utvrdit će se posebnim propisom koji donosi Pravosudna komisija na prijedlog komandira.

(3) Kriterije i postupak utvrđivanja prekobrojnosti regulirat će se posebnim pravilnikom koji donosi Pravosudna komisija na prijedlog komandira.

#### Član 80 (Stručno usavršavanje)

Službenici Sudske policije su dužni trajno se osposobljavati za poslove radnog mjesta i usavršavati stručne sposobnosti u organizovanim programima obuke.

Na prijedlog komandira Sudske policije u Plan stručnog usavršavanja koji donosi Pravosudna komisija, uvrstit će se programi obuke koji su adekvatni za usavršavanje stručnih sposobnosti službenika Sudske policije.

### DIO SEDMI – ČINOVI, OCJENA RADA I UNAPREĐENJE

#### Član 81 (Činovi službenika Sudske policije)

(1) Službenik Sudske policije stiče svoj početni čin zavisno od nivoa pristupa Sudskoj policiji, a svoje sljedeće činove postupkom unapređenja u skladu s ovim zakonom.

(2) Činovi službenika Sudske policije su:

- a) sudski policajac;
- b) stariji sudski policajac;
- c) narednik Sudske policije;
- d) stariji narednik Sudske policije;
- e) mlađi inspektor Sudske policije;
- f) inspektor Sudske policije;
- g) viši inspektor Sudske policije;
- h) samostalni inspektor Sudske policije;
- i) glavni inspektor Sudske policije.

#### Član 82 (Postupak unapređenja)

(1) Postupak za unapređenje službenika Sudske policije u viši čin provodi se u skladu s principima slobode prijavljivanja, jednakosti uslova i jednakih mogućnosti za sve službenike Sudske policije.

(2) Unapređenje službenika Sudske policije se provodi na osnovu:

- a) pokrenutog postupka popune upražnjenog radnog mjesta putem unapređenja;
- b) podnesenog zahtjeva za unapređenje kada su za radno mjesto na koje je službenik Sudske policije raspoređen propisana dva čina;

c) prijedloga za posebno unapređenje.

### Član 83 (Uslovi za unapređenje)

Službenik Sudske policije unapređuje se u naredni viši čin kada se ispune sljedeći uslovi:

- a) da ima školsku spremu u skladu s članom 84 ovog zakona;
- b) da je ispunjen uslov iz člana 85 ovog zakona;
- c) da su posljednje tri ocjene “dobar” ili više ocjene;
- d) da se protiv njega ne vodi krivični postupak ili disciplinski postupak za tešku povredu službene dužnosti;
- e) da je položio interni stručni ispit iz člana 87 ovog zakona;
- f) da njegovo unapređenje nije suspendirano u skladu s članom 108 ovog zakona.

### Član 84 (Školska sprema)

(1) Službenik Sudske policije koji se prijavljuje za unapređenje u čin stariji sudski policajac, čin narednik Sudske policije ili čin stariji narednik Sudske policije mora imati srednju stručnu spremu IV stepen.

(2) Službenik Sudske policije koji se prijavljuje za unapređenje u čin mlađi inspektor Sudske policije, čin inspektor Sudske policije ili čin viši inspektor Sudske policije mora imati najmanje završen prvi ciklus visokog obrazovanja sa 180 ECTS bodova ili VŠS - VI stepen školske spreme.

(3) Službenik Sudske policije koji se prijavljuje za unapređenje iz čina viši inspektor Sudske policije u čin samostalni inspektor Sudske policije ili iz čina samostalni inspektor Sudske policije u čin glavni inspektor Sudske policije mora imati najmanje završen prvi ciklus visokog obrazovanja sa 240 ECTS bodova ili VSS - VII stepen školske spreme.

### Član 85 (Vrijeme provedeno u činu)

(1) Vrijeme provedeno u prethodnom činu koje je potrebno da bi službenik Sudske policije stekao uslove za unapređenje u neposredno viši čin je:

- a) iz čina sudski policajac u čin stariji sudski policajac - tri godine;
- b) iz čina stariji sudski policajac u čin narednik Sudske policije – četiri godine;
- c) iz čina narednik Sudske policije u čin stariji narednik Sudske policije – četiri godine;
- d) iz čina mlađi inspektor Sudske policije u čin inspektor Sudske policije - četiri godine za službenika Sudske policije sa VŠS - VI stepenom školske spreme ili završenim prvim ciklusom visokog obrazovanja sa 180 ECTS bodova i dvije godine za službenika Sudske policije sa VSS - VII stepenom stručne spreme ili najmanje završenim drugim ciklusom visokog obrazovanje sa 240 ECTS bodova;

e) iz čina inspektor Sudske policije u čin viši inspektor Sudske policije - četiri godine za službenika Sudske policije sa VŠS - VI stepenom školske spreme ili završenim prvim ciklusom visokog obrazovanja sa 180 ECTS bodova i dvije godine za službenika Sudske policije sa VSS - VII stepenom stručne spreme ili najmanje završenim drugim ciklusom visokog obrazovanja sa 240 ECTS bodova;

f) iz čina viši inspektor Sudske policije u čin samostalni inspektor Sudske policije - tri godine;

g) iz čina samostalni inspektor Sudske policije u čin glavni inspektor Sudske policije – tri godine.

(2) Vrijeme trajanja suspenzije službenika Sudske policije koja je rezultirala izricanjem sankcije ili mjere u disciplinskom odnosno krivičnom postupku ne uračunava se u vrijeme provedeno u činu u smislu stava 1 ovog člana.

(3) Izuzetno od stava 1 ovog člana za unapređenje u čin mlađi inspektor Sudske policije može se prijaviti službenik Sudske policije koji je raspoređen na poslovima sa srednjom stručnom spremom – IV stepen, a posjeduje najmanje VŠS – VI stepen školske spreme ili prvi ciklus visokog obrazovanja sa 180 ECTS bodova, ako je na poslovima službenika Sudske policije proveo najmanje tri godine i ispunjava ostale uslove za sticanje čina mlađi inspektor Sudske policije.

#### Član 86 (Posebno unapređenje)

(1) Službenik Sudske policije čiji je rad u prethodne tri godine ocijenjen ocjenom naročito uspješan, uz obrazloženje da je u tom periodu postigao izvanredne rezultate i značajno doprinio unapređenju organizacije i rezultata rada Sudske policije, te koji je proveo u trenutnom činu pola vremena propisanog za sticanje višeg čina i koji ispunjava uslove iz člana 88 ovog zakona, može biti unaprijeđen u sljedeći viši čin zaključno s činom viši inspektor Sudske policije.

(2) Službenik Sudske policije može biti unaprijeđen na način iz stava 1 ovog člana najviše dva puta u toku rada u Sudskoj policiji.

#### Član 87 (Interni stručni ispit)

(1) Službenik Sudske policije koji ispuni ostale uslove za unapređenje u čin narednik Sudske policije, mlađi inspektor Sudske policije i čin samostalni inspektor Sudske policije, obavezan je položiti interni stručni ispit za unapređenje u Sudskoj policiji.

(2) Interni stručni ispit se polaže pred Komisijom koju imenuje Pravosudna komisija.

#### Član 88 (Propis o činovima, internom stručnom ispitu i unapređenju)

Izgleđ činova službenika Sudske policije, postupak dodjele i unapređenja, interni stručni ispit, imenovanje i način rada Komisije i druga pitanja vezana za proceduru sticanja činova, interni stručni ispit i unapređenje službenika Sudske policije uređuje se propisom koji na prijedlog komandira donosi Pravosudna komisija.

**Član 89**  
(Ocjenjivanje rada službenika Sudske policije)

(1) Sudska policija jednom godišnje za prethodnu kalendarsku godinu vrši ocjenjivanje rada službenika Sudske policije.

(2) Ocjene rada službenika Sudske policije su:

- a) nezadovoljava;
- b) zadovoljava;
- c) dobar;
- d) uspješan;
- e) naročito uspješan.

(3) Službenik Sudske policije koji je u periodu ocjenjivanja bio odsutan s rada duže od šest mjeseci u toku kalendarske godine neće se ocijeniti.

**Član 90**  
(Propis o ocjenjivanju rada)

Postupak, kriteriji i način testiranja za godišnje ocjenjivanje službenika Sudske policije utvrđuje se propisom o ocjenjivanju rada koji na prijedlog komandira donosi Pravosudna komisija.

**DIO OSMI - USLOVI RADA, PLATE I NAKNADE**

**Član 91**  
(Radno vrijeme službenika Sudske policije)

(1) U pravilu prosječno puno radno vrijeme službenika Sudske policije je 40 sati sedmično, raspoređeno na najmanje pet radnih dana.

(2) Redovno radno vrijeme je osam sati dnevno, što uključuje pauzu u toku radnog vremena.

(3) Raspored radnog vremena određuje komandir.

**Član 92**  
(Preraspodjela radnog vremena službenika Sudske policije)

(1) Puno radno vrijeme službenika Sudske policije može se preraspodijeliti tako da tokom jednog perioda traje duže, a tokom drugog perioda kraće od punog radnog vremena, s tim da prosječno radno vrijeme tokom preraspodjele ne može biti duže od 50 sati sedmično.

(2) Preraspodjela radnog vremena se primjenjuje zbog vršenja sljedećih poslova i zadataka:

- a) kod kojih je potreban kontinuitet rada i
- b) kada se određeni zadaci moraju izvršiti u određenim rokovima ili u planiranom vremenskom periodu.

#### Član 93

##### (Raspored radnog vremena)

(1) Službenik Sudske policije dužan je u obavljanju poslova raditi po rasporedu radnog vremena.

(2) Radno vrijeme može biti:

- a) u smjenama;
- b) u turnusu;
- c) subotama, nedjeljama, blagdanima, praznicima i drugim neradnim danima;
- d) na terenu;
- e) noću;
- f) dvokratno radno vrijeme;
- g) pripravnost za rad.

(3) Kada je poslove potrebno obavljati u neprekidnom trajanju, redovno radno vrijeme službenika Sudske policije, može trajati duže od osam sati u periodu od 24 sata, ali ne duže od 12 sati osim u slučajevima kada je potrebno izvršiti započetu aktivnost.

#### Član 94

##### (Rad u vanrednim prilikama)

(1) U slučaju više sile, elementarne nepogode ili izvanrednog povećanja obima posla, službenik Sudske policije, obavezan je da radi duže od punog radnog vremena, odnosno prekovremeno.

(2) Prekovremeni rad iz stava 1 ovog člana može trajati najviše do 20 sati sedmično.

(3) Za poslove iz stava 1 ovog člana službenici Sudske policije imaju pravo na naknadu u slobodnim satima.

#### Član 95

##### (Godišnji odmor i odsustva)

Službenik Sudske policije ostvaruje pravo na godišnji odmor, plaćeno i neplaćeno odsustvo u skladu sa Zakonom o službenicima i namještenicima u pravosuđu Brčko distrikta BiH i Pravilnikom o radu u pravosuđu Brčko distrikta BiH.

#### Član 96

(Stož s uvećanim trajanjem)

(1) Službenik Sudske policije ima pravo na staž s uvećanim trajanjem, po kojem se svakih 12 mjeseci efektivno provedenih na radu računa kao 16 mjeseci staža osiguranja.

(2) Računanje staža iz stava 1 ovog člana vrši se na način kako je to utvrđeno propisom kojim se uređuje penzijsko i invalidsko osiguranje.

Član 97  
(Penzijski osnov)

Na utvrđivanje penzijskog osnova za službenike Sudske policije shodno se primjenjuje propis kojim se uređuje utvrđivanje penzijskog osnova policijskih službenika Policije Brčko distrikta BiH.

Član 98  
(Plata, dodaci i ostale naknade službenika Sudske policije)

Plata, dodatak na platu i naknade službenika Sudske policije propisane su Zakonom o platama i drugim naknadama zaposlenih u pravosuđu Brčko distrikta BiH.

Član 99  
(Pohvale, nagrade, priznanja i zahvalnice)

(1) Službeniku Sudske policije za izuzetne rezultate u radu može biti dodijeljena pohvala, nagrada i priznanje.

(2) Sudska policija može dodijeliti zahvalnicu i priznanje drugoj fizičkoj i pravnoj osobi koja je doprinijela uspješnosti i afirmaciji rada Sudske policije.

(3) Vrste, uslove i postupak dodjele pohvala, nagrada, priznanja i zahvalnica uređuje se propisom koji na prijedlog komandira donosi Pravosudna komisija.

DIO DEVETI – DISCIPLINSKA I MATERIJALNA ODGOVORNOST

Član 100  
(Disciplinska odgovornost službenika Sudske policije)

(1) Službenik Sudske policije je disciplinski odgovoran za povrede službene dužnosti propisane ovim zakonom.

(2) Službenik Sudske policije disciplinski je odgovoran za povredu službene dužnosti učinjenu za vrijeme vršenja službe i izvan službe.

Član 101  
(Odnos krivične, prekršajne i disciplinske odgovornosti)

(1) Krivična ili prekršajna odgovornost za krivično djelo ili prekršaj ne isključuje disciplinsku odgovornost službenika Sudske policije ukoliko radnja povrede službene dužnosti istovremeno predstavlja učinjenje krivičnog djela ili prekršaja.

(2) Oslobođanje od krivične ili prekršajne odgovornosti ne podrazumijeva istovremeno i oslobođanje od disciplinske odgovornosti.

Član 102  
(Povrede službene dužnosti)

Povrede službene dužnosti mogu biti lakše i teže.

Član 103  
(Lakše povrede službene dužnosti)

Lakše povrede radnih dužnosti su:

- a) nenošenje ili nepropisno nošenje uniforme, obuće, oružja i opreme,
- b) nedolazak na posao u određeno vrijeme i odlazak s posla prije kraja radnog vremena,
- c) neblagovremeno obavještanje pretpostavljenog o spriječenosti dolaska na rad bez opravdanog razloga,
- d) nepriстойno ponašanje prema radnim kolegama i drugim zaposlenim u pravosuđu ili strankama i izazivanje svađe i narušavanje međuljudskih odnosa na poslu i
- e) nemarno i neblagovremeno vršenje radnih i drugih zadataka koje su izazvale ili mogle izazvati štetne posljedice manjeg obima, a ne spada u težu povredu radne dužnosti.

Član 104  
(Teže povrede službene dužnosti)

Teže povrede službene dužnosti su:

- a) neizvršavanje, nesavjesno, neblagovremeno ili nepažljivo izvršavanje službenih zadataka;
- b) izbjegavanje obaveza vezanih za profesionalnu obuku i usavršavanje;
- c) neovlašteno korištenje sredstava povjerenih radi izvršavanja zadataka i dužnosti;
- d) vršenje aktivnosti koje nisu u skladu s interesima Sudske policije ili bez prethodnog odobrenja komandira;
- e) ponašanje koje onemogućava, ometa ili otežava drugima izvršavanje službenih zadataka odnosno njihovih prava;
- f) odbijanje pružanja pomoći građanima ako mogu nastupiti posljedice opasne po život i zdravlje građana;
- g) ponašanje suprotno odredbama ovog zakona i podzakonskih propisa kojim se narušava ugled Sudske policije;



- h) nepoduzimanje ili nedovoljno poduzimanje mjera u okviru vlastitih dužnosti neophodnih za izvršenje službenih zadataka;
- i) nepružanje pomoći drugom službeniku Sudske policije koji traži pomoć kada mu je pomoć neophodna za izvršavanje njegovih službenih zadataka;
- j) prikrivanje činjenica o načinu izvršavanja službenih radnji ili upotrebi sile drugog službenika Sudske policije koji je načinom izvršenja službene radnje ili upotrebom sredstava prisile učinio težu povredu službene dužnosti;
- k) otkrivanje tajnih, ličnih ili drugih službenih podataka suprotno odredbama zakona i podzakonskih propisa;
- l) samovoljno napuštanje dužnosti ili mjesta čuvanja određenog objekta koje može imati štetne posljedice;
- m) dolazak na posao pod uticajem alkohola ili narkotika, korištenje narkotika, opijata ili alkohola za vrijeme radnog vremena;
- n) sprečavanje, izbjegavanje, ometanje ili na drugi način odgađanje provođenja internih ili disciplinskih postupaka;
- o) narušavanje javnog reda i mira, posebno nepristojnim i grubim ponašanje, tučom na javnom mjestu ili bilo kojom drugom radnjom kojom se narušava javni red i mir i tom radnjom narušava ugled Sudske policije, bez obzira na vrijeme i mjesto događaja;
- p) davanje netačnih podataka koji utiču na donošenje odluka u Sudskoj policiji;
- r) neopravdano odsustvo s dužnosti u trajanju od najmanje dva uzastopna radna dana ili ukupno pet radnih dana s prekidima u toku šest mjeseci;
- s) zloupotreba bolovanja;
- t) izbjegavanje provjere posebne psihičke i tjelesne zdravstvene sposobnosti;
- u) upotreba sredstava prinude u suprotnosti s ovim zakonom;
- v) zloupotreba službenih ovlaštenja ili odbijanje izvršavanja zakonitih naredbi izdatih u svrhu izvršavanja službenih zadataka i dužnosti;
- z) vršenje diskriminacije pri vršenju dužnosti na osnovu: rase, boje kože, spola, jezika, religije, političkog ili drugog opredjeljenja, nacionalnog ili socijalnog porijekla ili po bilo kojem drugom osnovu;
- ž) učinjenje tri ili više lakših povreda službene dužnosti u periodu od dvije godine.

## Član 105

### (Organi za vođenje disciplinskog postupka)

- (1) Organi za vođenje disciplinskog postupka su:
  - a) komandir;
  - b) Disciplinska komisija za provođenje disciplinskih postupka protiv službenika i namještenika u pravosuđu Brčko distrikta BiH;
  - c) disciplinski tužilac i zamjenik disciplinskog tužioca za postupanje po disciplinskim prijavama i pokretanje disciplinskih postupaka protiv službenika i namještenika u pravosuđu Brčko distrikta BiH.
  
- (2) O lakšim povredama službene dužnosti u prvom stepenu odlučuje komandir u okviru svoje nadležnosti.
  
- (3) Rok za pokretanje disciplinskog postupka je:

a) 15 dana od dana prijema disciplinske prijave ili dana saznanja za povredu službene dužnosti, za povrede iz stava 2 ovog člana;

b) 30 dana od dana prijema disciplinske prijave ili dana saznanja za povredu službene dužnosti, za teže povrede službene dužnosti.

(4) U slučaju nepostupanja u skladu sa stavom 3 ovog člana, Pravosudna komisija pokreće prekršajni postupak protiv komandira.

(5) O težim povredama službene dužnosti u prvom stepenu odlučuje Disciplinska komisija po zahtjevu za pokretanje disciplinskog postupka koji je pokrenuo disciplinski tužilac.

(6) Protiv odluke Disciplinske komisije u prvom stepenu, disciplinski tužilac i lice protiv koga se vodi disciplinski postupak mogu uložiti žalbu Pravosudnoj komisiji u roku od osam dana od dana dostavljanja odluke.

#### Član 106 (Disciplinski postupak)

Na sva pitanja disciplinskog postupka koja nisu regulisana ovim zakonom, a odnose se naročito na odluke u disciplinskom postupku, rokove postupanja, zastaru pokretanja i vođenja postupka, načela postupka, izricanje disciplinske kazne u slučaju sticaja povreda službenih dužnosti i određivanja izvršenja kazne, primjenjuju se odgovarajuće odredbe Zakona o službenicima i namještenicima u pravosuđu Brčko distrikta BiH i Pravilnika o disciplinskoj i materijalnoj odgovornosti u pravosuđu Brčko distrikta BiH.

#### Član 107 (Vrste kazni)

(1) Za lakše povrede službene dužnosti mogu se izreći sljedeće kazne:

- a) pismena opomena;
- b) pismena opomena s upisom u personalni obrazac službenika Sudske policije;
- c) novčana kazna u visini deset posto plate službenika Sudske policije isplaćene u mjesecu u kojem je kazna izrečena.

(2) Za teže povrede službene dužnosti mogu se izreći sljedeće kazne:

- a) novčana kazna u visini dvadeset posto ukupne plate isplaćene službeniku Sudske policije u mjesecu u kojem je kazna izrečena, a koja se može izreći u trajanju od jednog do šest mjeseci;
- b) premještaj u niži nivo platnog razreda u trajanju od šest mjeseci do dvije godine;
- c) zabrana napredovanja u viši nivo platnog razreda u trajanju od dvije godine;
- d) prestanak radnog odnosa.

(3) Komandir u slučaju da utvrdi lakšu povredu službene dužnosti može izreći kazne navedene u stavu 1 tačkama a), b) i c) ovog člana.

(4) Kazne izrečene u disciplinskom postupku zbog povrede službene dužnosti provode Pravosudna komisija i Direkcija za finansije Distrikta.

#### Član 108 (Disciplinska mjera)

Za teže povrede službene dužnosti službeniku Sudske policije, pored kazne, može biti izrečena i disciplinska mjera zabrane unapređenja u viši čin u trajanju do pet (5) godina.

#### Član 109 (Suspenzija)

(1) Službenik Sudske policije mora biti privremeno udaljen s poslova i zadataka koje vrši ako je potvrđena optužnica za krivično djelo učinjeno u vršenju njegovih poslova i zadataka ili ako mu je određen pritvor.

(2) Službenik Sudske policije može biti privremeno udaljen s poslova i zadataka koje vrši ako je protiv njega pokrenut krivični postupak ili disciplinski postupak zbog učinjene teže povrede radne dužnosti i ako se, uzimajući u obzir prirodu krivičnog djela ili prirodu teže povrede radne dužnosti, može osnovano vjerovati da bi njegovo prisustvo štetilo interesima službe da i dalje ostane na radnom mjestu na koje je raspoređen.

(3) Udaljenje službenika Sudske policije iz Sudske policije može trajati do okončanja krivičnog ili disciplinskog postupka.

(4) Tokom udaljenja službeniku Sudske policije se oduzima službeno oružje, sredstva prinude, službena značka i legitimacija i zabranjuje nošenje uniforme.

(5) O udaljenju službenika Sudske policije odlučuje komandir donošenjem rješenja o udaljenju.

(6) Protiv rješenja o udaljenju službenik Sudske policije može podnijeti žalbu Pravosudnoj komisiji, u roku od osam dana od dana dostavljanja rješenja.

(7) Žalba ne odlaže izvršenje rješenja, a rješenje po žalbi mora se donijeti u roku od 15 dana.

(8) Odluka Pravosudne komisije je konačna i protiv nje se može voditi postupak pred Osnovnim sudom Brčko distrikta BiH.

#### Član 110 (Naknada plate za vrijeme trajanja suspenzije)

(1) Tokom suspenzije službenik Sudske policije ima pravo na naknadu plate u visini od 70% od svoje osnovne plate uvećane za minuli rad isplaćene u mjesecu koji je prethodio suspenziji.

(2) U posebnim slučajevima, kada ima porodicu koju izdržava, suspendovani službenik Sudske policije ima pravo na 85% od svoje osnovne plate uvećane za minuli rad isplaćene u mjesecu koji je prethodio suspenziji.

#### Član 111

(Odgovornost službenika Sudske policije za materijalnu štetu)

(1) Službenik Sudske policije je dužan nadoknaditi štetu koju u službi ili u vezi sa službom namjerno ili iz krajnje nepažnje nanese pravosudnoj instituciji.

(2) Štetom iz stava 1 ovoga člana smatra se i šteta koju je pravosudna institucija imala nadoknađujući fizičkim i pravnim licima štetu koju su pretrpjeli namjerom ili krajnjom nepažnjom službenika Sudske policije.

#### Član 112

(Postupak naknade materijalne štete)

Na sva pitanja postupka naknade materijalne štete, a koja se odnose na utvrđivanje okolnosti pod kojima je nastala šteta, pismeni sporazum, rok za naknadu štete, uspostavu prijašnjeg stanja, naknadu štete nastale povredom službene dužnosti, oslobođenje od odgovornosti za štetu i ostala pitanja, primjenjuju se odgovarajuće odredbe Zakona o službenicima i namještenicima u pravosuđu Brčko distrikta BiH i Pravilnika o disciplinskoj i materijalnoj odgovornosti u pravosuđu Brčko distrikta BiH.

### DIO DESETI – PRESTANAK RADNOG ODNOSA

#### Član 113

(Prestanak radnog odnosa)

Pravila o prestanku radnog odnosa propisana Zakonom o službenicima i namještenicima u pravosuđu Brčko distrikta BiH shodno se primjenjuju i na službenike Sudske policije Brčko distrikta BiH.

### DIO JEDANAESTI - PRIJELAZNE I ZAVRŠNE ODREDBE

#### Član 114

(Službenici Sudske policije koji su stekli čin prema ranijem propisu)

Službenici Sudske policije kojima su pravosnažnim odlukama dodijeljeni činovi u skladu sa zakonima i drugim propisima koji su bili na snazi prije stupanja na snagu ovog zakona zadržavaju dodijeljene činove.

#### Član 115

(Postupci u toku)

Predmeti u kojima nije okončan postupak pred nadležnim tijelima Sudske policije do stupanja na snagu ovog zakona, rješavat će ta nadležna tijela prema odredbama zakona i drugih propisa koji su bili na snazi prije stupanja na snagu ovog zakona.

Član 116  
(Podzakonski propisi)

Pravosudna komisija će u roku od 60 dana od dana stupanja na snagu ovog zakona donijeti:

- a) propis iz člana 14 ovog zakona;
- b) propis iz člana 30 ovog zakona;
- c) propis iz člana 60 ovog zakona;
- d) propis iz člana 66 ovog zakona;
- e) propis iz člana 71 stava 3 ovog zakona;
- f) propis iz člana 72 stava 2 ovog zakona;
- g) propis iz člana 73 stava 1 ovog zakona;
- h) propis iz člana 74 stava 3 ovog zakona;
- i) propis iz člana 79 stava 2 ovog zakona;
- j) propis iz člana 79 stava 3 ovog zakona;
- k) propis iz člana 88 ovog zakona;
- l) propis iz člana 90 ovog zakona;
- m) propis iz člana 99 stava 3 ovog zakona.

Član 117  
(Prestanak važenja zakona i propisa)

(1) Danom stupanja na snagu ovog zakona prestaje da važi Zakon o Sudskoj policiji Brčko distrikta BiH (Službeni glasnik Brčko distrikta BiH, br.: 18/18 – prečišćeni tekst).

(2) Do stupanja na snagu propisa iz člana 119 ovog zakona, primjenjivat će se podzakonski propisi doneseni na osnovu zakona iz stava 1 ovog člana.

Član 118  
(Stupanje na snagu)

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH.

Broj: 01-02-1240/21  
Brčko, 10. 3. 2021. godine

PREDSJEDNIK  
SKUPŠTINE BRČKO DISTRIKTA BiH

**Mr. sci. Siniša Milić**